

四庫全書

集部

欽定四庫全書

集部

漢魏六朝百三家集卷八十八

詳校官庶吉士臣謝恭銘

主事銜臣徐以坤覆勘

總校官檢討臣何思鈞

校對官編修臣吳舒帷

謄錄監生臣黃鑫

欽定四庫全書

漢魏六朝百三家集卷八十八

梁沈約集

目錄

樂府

梁雅樂十一首

皇雅 三曲

滌雅 一曲

騷雅 一曲

誠雅 三曲

獻雅 一曲

禮雅 二曲

梁南郊登歌詩二首

梁北郊登歌二首

梁明堂登歌五首

青帝

赤帝

黃帝

白帝

黑帝

梁宗廟登歌七首

梁三朝雅樂歌六首

俊雅 三曲

肩雅 一曲

寅雅

一曲

介雅

三曲

需雅

八曲

雍雅

三曲

五引曲五首

角引

徵引

宮引

商引

羽引

梁鼓吹曲十二首

木紀謝

賢首山

桐柏山

道亡

忱威

漢東流

鶴樓峻

昏主恣淫慝

石首局

期運集

於穆

惟大梁

梁大壯大觀舞歌二首

大壯舞歌

大觀舞歌

梁鞞舞歌

明之君六首

日出東南隅行

昭君辭

長歌行

又

君子行

從軍行

豫章行

相逢狹路間

長安有狹斜行

三婦豔

江離生幽渚

却出東西門行

飲馬長城窟

青青河畔草

梁甫吟

君子有所思行

白馬篇

齊謳行

前緩聲歌

鼓吹曲二首同諸公賦

芳樹

臨高臺

洛陽道

江南曲

東武吟行

怨歌行

悲哉行

攜手曲

有所思

夜夜曲

二曲

釣竿

臨碣石

湘夫人

貞女引

襄陽白銅鞮歌三首

永明樂

江南弄四首

趙瑟曲

秦箏曲

陽春曲

朝雲曲

樂未央

四時白紵歌五首

春白紵

夏白紵

秋白紵

冬白紵

夜白紵

詩

侍皇太子釋奠宴

為南郡王侍皇太子釋奠宴二首

三日侍鳳光殿曲水宴應制

為臨川王九日侍太子宴

九日侍宴樂遊苑

從齊武帝瑯琊城講武應詔

三日侍林光殿曲水宴應制

侍宴樂遊苑餞呂僧珍應詔

正陽堂宴勞凱旋

遊鍾山詩應西陽王教

五章

登高望春

遊金華山

劉真人東山還

登玄暢樓

酬謝宣城朓卧疾

新安江至清淺深見底貽京邑遊好

送別友人

去東陽與吏民別

早發定山

循役朱方道路

和竟陵王遊仙詩二首

遊沈道士館

還園宅奉酬華陽先生

華陽先生登樓不復下贈呈

酬華陽陶先生

奉華陽王外兵

赤松澗

八關齋

古意

少年新婚為之詠

夢見美人

直學省愁卧

休沐寄懷

宿東園

行園

和左丞庾杲之病

和竟陵王抄書

奉和竟陵王郡縣名

奉和竟陵王藥名

和陸慧曉百姓名

三月三日率爾成章

織女贈牽牛

應王中丞思遠咏月

和王中丞德克詠白雪

詠雪應令

和劉雍州繪博山香鑪

詠湖中鴈

冬節後至丞相第詣世子車中作

奉和竟陵王經劉嘯墓

悼亡

侍遊方山應詔

樂將殫恩未已應詔

泛永康江

餞謝文學離夜

別范安成

效古

庭雨應詔

初春

春思

傷春

秋夜

同詠樂器

詠簫

同詠坐上玩器

詠竹櫝榔盤

簷前竹

翫庭柳

麥李

詠桃

詠青苔

十詠二首

領邊繡

脚下履

懷舊詩九首

傷王融

傷謝朓

傷庾杲之

傷王湛

傷虞炎

傷李珪之

傷韋景猷

傷劉渢

傷胡諧之

詠新荷應詔

聽蟬鳴應詔

詠笙

詠箏

詠石榴

大言應令

細言應令

詠餘雪

詠帳

侍宴詠反舌

寒松

詠孤桐

詠梧桐

園橘

詠梨應詔

西地梨

詠芙蓉

詠杜若

詠鹿蔥

甘蕉

詠菰

早行逢故人車中為贈

為鄰人有懷不至

阻雪連句

和劉中書仙詩二首

華山館為國家營功德

和王衛軍解講

侍宴謝朓宅餞東歸應制

酬孔通直過懷蓬居

石塘瀨聽猿

出重圍和傅昭

秋晨羈怨望海思歸

侍宴樂遊苑餞徐州刺史應詔

憩郊園和約法師採藥

四城門

老

上巳華光殿

六憶詩四首

八詠詩

登臺望秋月

會圃臨東風

歲暮愍衰草

霜來悲落桐

夕行聞夜鶴

晨征聽曉鴻

解佩去朝市

被褐守山東

漢魏六朝百三家集卷八十八目錄

欽定四庫全書

漢魏六朝百三家集卷八十八

明 張溥 輯

梁沈約集

樂府

梁雅樂歌十一首

皇雅 三曲

皇帝出入宋孝建起居注奏永至至是
改為皇雅取詩皇矣上帝臨下有赫也

欽定四庫全書

漢魏六朝百三家集

卷八十八

一

帝德實廣運車書靡不賓執瑄朝羣后垂旒御百神八
荒重譯至萬國遠來親

華蓋拂紫微勾陳繞太一容裔被緹組參差羅畢畢星
回昭以爛天行徐且謐

清蹕朝萬寓端冕臨正陽青紵黃金纓袞衣文繡裳既
散華蟲采復流日月光

滌雅 一曲

牲出入宋元徽儀注奏引牲至是改
為滌雅取禮記帝牛必在滌三月也

將修盛禮其儀孔熾有膋斯牲國門是置不黎不瘠靡
愆靡忌呈肌獻體永言昭事俯休皇德仰綏靈志百福
具膺嘉祥允洎駿奔伊在慶覃遐嗣

牲雅 一曲

薦毛血宋元徽儀注奏嘉薦至是改
為牲雅取春秋左氏傳牲牲肥膋也

反本興敬復古昭誠禮容宿設祀事孔明華俎待獻崇
碑麗牲克哉繭握肅矣簪纓其膋既啟我豆既盈庖丁
游必葛盧駢聲多祉攸集景福來并

誠雅三曲

降神及迎送宋元徽儀注奏昭夏至
是改為誠雅取尚書至誠感神也

懷忽慌瞻浩蕩盡誠潔致虔想出杳冥降無象皇情肅
具僚仰人禮盛神途敬優明靈申敬享感蒼極動玄壤
降神

地德溥崑丘峻揚羽翟鼓應輅出尊祗展誠信招海瀆
羅嶽鎮惟福祉咸昭晉迎神

我有明德馨非稷黍牲玉孔備嘉薦惟旅金懸宿設和

樂具舉禮達幽明敬行尊俎鐘鼓云送遐福是與送神

獻雅 一曲

皇帝飲福酒宋元徽儀注奏嘉祚梁初改為永祚至是改為獻雅取禮記祭統尸飲五洗玉爵獻卿今之福酒亦古獻爵之義也

神宮肅肅天儀穆穆禮獻既同膺茲隆福我有馨明無愧史祝

禋雅 二曲

就燎位宋元徽儀注奏昭遠就埋位齊永明儀注奏隸幽至是燎埋俱奏禋雅取周禮大

宗伯以禋祀祀

昊天上帝也

紫宮昭煥太乙微玄降臨下土尊高上天載陳珪幣式
備牲牷雲箴清引枸虞高懸俯昭物象仰致高煙肅彼

靈祉咸達皇虔

就燎用

盛樂斯舉協徵調宮靈響慶洽祉積化融八變有序三
獻已終坎牲瘞玉酌德報功振垂成呂投壤生風道無
虛致事由感通於皇盛烈比祚華嵩

就埋用

梁南郊登歌詩二首

瞰既明禮告成惟聖祖主上靈爵已獻壘又盈息羽籥
展歌聲優如在結皇情

禮容盛尊俎列玄酒陳陶匏設獻清酒致虔潔王既升
樂已闋降蒼昊垂芳烈

梁北郊登歌二首

方壇既埽地祇已出盛典弗僭羣望咸秩乃升乃獻敬
成禮卒靈降無兆神饗載謐允矣嘉祚其升如日

至哉坤元實惟厚載躬茲奠饗誠交顯晦或升或降搖

珠動珮德表成物慶流皇代純嘏不訐祺福是賚

梁明堂登歌五首

青帝

帝居在震龍德司春開元布澤含和尚仁羣居既散歲
云陽止飭農分地民粒惟始雕梁繡栱丹楹玉墀靈威
以降百福來綏

赤帝

炎光在離火為威德執禮昭訓持衡受則靡草既凋溫

風以至嘉薦惟旅時羞孔備齊醑在堂笙鏞在下匪惟
七百無絕終始

黃帝

鬱彼中壇含靈闡化迴環氣象輪無輟駕布德焉在四
序將收音宮數五飯稷騶駟宅屏居中旁臨外宇升為
帝尊降為神主

白帝

神在秋方帝居西皓允茲金德裁成萬寶鴻來雀化參

見火斜幕無玄鳥菊有黃華載列笙磬式陳彝俎靈罔
常懷惟德是與

黑帝

德盛乎水玄冥紀節陰降陽騰氣凝象閔

隋書
作閔

司智蒞

坎駕鐵衣玄祈寒折地晷度迴天悠悠四海駿奔奉職
祚我無疆永隆民極

梁宗廟登歌七首

功高禮洽德尊樂備三獻具舉百司在位誠敬罔訾幽

明同致茫茫億兆無思不遂蓋之如天容之如地

殷兆玉筐周始邠王於赫文祖基我大梁肇土七十奄
有四方帝軒百祀人思未忘永言聖烈祚我無疆

有夏多罪殷人塗炭四海倒懸十室思亂自天命我殲
凶殄難既躍乃飛言登天漢爰享爰格福祿攸贊

犧象既飾壘俎斯具我鬱載馨黃流乃注我我卿士駿
奔是務佩上鳴堦纓還拂樹悠悠億兆天臨日煦

猗歟至德光被黔首鑄銘蒼昊甄陶區有恪恭三獻對

揚萬壽比屋可封含生無咎匪徒七百年長地久

有命自天於皇后帝悠悠四海莫不來祭繁祉具膺八
神聳衛福至有兆慶來無際播此餘休于彼荒裔

祀典昭潔我禮莫違八簋充室六龍解駢神宮肅肅靈
寢微微嘉薦既饗景福攸歸至德光被洪祚載輝

梁三朝雅樂歌六首

梁初郊禋宗廟及三朝之樂並用宋齊儀注
唯改嘉祚為永祚又去永至之樂及帝定國
並以雅為稱取詩序云言天下之事形四方
之風謂之雅雅者正也止於十二則天數也

乃去階步之樂增徹食
之雅馬詞並沈約所製

俊雅 三曲

衆官出入宋元徽儀注奏肅威樂至是改爲
俊雅取禮記司徒論選士之秀者升之學曰
俊士也

設官分職髦俊攸俟髦俊伊何貴德尚齒唐又咸事周
寧多士區區衛國猶賴君子漢之得人帝猷乃理

開我八襲闢我九重珩珮流響纓紱有容袞衣前邁列
辟雲從義兼東序事美西雍分階等肅異列齊恭

重列北上分庭異陞百司揚職九賓相禮齊宋舅甥魯
衛兄弟思皇藹藹羣龍濟濟我有嘉賓實惟愷悌

肩雅 一曲

皇太子出入奏肩雅取詩
君子萬年永錫祚肩也

自昔殷代哲王迭有降及周成惟器是守上天乃眷大
梁既受灼灼重明仰承元首體乾作貳命服斯九置保
置師居前居後前星比耀克隆萬壽

寅雅 一曲

王公出入奏寅雅取尚書周
官三公弘化寅亮天地也

禮莫違樂具舉延藩辟朝帝所執桓蒲列齊莒垂袞毳
紛容與升有儀降有序齊簪紱忘笑語始矜嚴終酣醕

介雅 三曲

上壽酒奏介雅取詩君
子萬年介爾景福也

百福四象初萬壽三元始拜獻惟袞職同心協卿士北
極永無窮南山何足擬

壽隨百禮洽慶與三朝升惟皇集繁祉景福互相仍申

金少微八
卷八十八
錫永無遺穰簡必來應

百味既含馨六飲莫能尚玉罍信湛湛金卮頗搖漾敬
舉發天和祥祉流嘉貺

需雅八曲

食舉奏需雅取易曰雲上於
天需君子以飲食燕樂也

實體平心待和味庶羞百品多為貴或鼎或鬲宣九沸
楚桂胡鹽芼芳卉加籩列俎彫且蔚

五味九變兼六和令芳甘旨庶且多三危之露九期一
作一

貞
禾圓案方丈粲星羅皇舉斯樂同山河

九州上腴非一族玄芝碧樹壽華木終期采之不盈掬
用拂腥膻和九穀既甘且飫致遐福

人欲所大味為先興和盡敬咸在蒔碧鱗朱尾獻嘉鮮
紅毛綠翼墜輕翮臣拜稽首萬斯年

擊鐘以俟惟大國況乃御天流至德侑食斯舉揚盛則
其禮不訐儀不忒風猷所被深且塞

膳夫奉職獻芳滋不麝不天咸以時調甘適苦別澠淄

其德不爽受福釐於焉逸豫永無期

備味斯饗惟至聖咸降人神禮為盛或風或雅流歌詠
負鼎言歸啟殷命悠悠四海同茲慶

藻我六穗羅八珍洪鼎自爨匪勞薪荆包海物必來陳
滑甘滫瀡味和神以斯至德被無垠

雍雅 三曲

徹饌奏雍雅取禮記
大饗客出以雍徹也

明明在上其儀有序終事靡訐收鉶撒俎乃升乃降和

樂備舉天德莫違人謀是與敬行禮達茲焉讌語

我餽維阜我有孔庶嘉味既克食旨斯飫屬厭無爽冲和在御擊壤齊歡懷生等豫烝庶乃粒實由仁恕

百司警列皇在在陞既飲且醕卒食成禮其容穆穆其儀濟濟凡百庶寮莫不愷悌奄有萬國抑由天啟

五引曲五首

角引

萌生觸法歲在春咸池始奏德尚仁慈憑以息和且均

徵引

執衡司事宅離方滔滔夏日火德昌八音備舉樂無疆

宮引

八音資始君五聲興此和樂感百精優游律呂被咸英

商引

司秋紀兌奏西音激揚鐘石和琴瑟風流福被樂愔愔

羽引

玄英紀運冬冰拆

一作圻

物為音本和且悅窮高測深長

無絕

梁鼓吹曲十二首

鼓吹宋齊並用漢曲又克庭用十六曲梁祖
乃去四曲留其十二合日時也更制新歌以

迷功
德

木紀謝

漢朱鷺改為木紀
謝言齊謝梁升也

木紀謝火運昌炳南陸耀炎光民去癸鼎歸梁鮫魚出
慶雲翔輶五帝軼三王德無外化溥將仁蕩蕩義湯湯

浸金石達昊蒼橫四海被八荒舞干戚垂衣裳對天眷
坐巖廊脣有錫祚無疆風教遠禮容盛感人神宣舞詠
降繁祉延嘉慶

賢首山

漢思悲翁改為賢首山言武帝破魏軍於司部肇王迹也

賢首山險而峻乘峴憑臨胡陣騁奇謀奮卒徒斷白馬
塞飛狐殪日逐殲骨都必谷蠡馘林胡草既潤原亦塗
輪無反幕有烏掃殘孽震戎逋揚凱奏展歡酺詠杖杜

旋京吳

桐栢山

漢父如張改為桐栢山言武帝牧司王業彌章也

桐栢山淮之首肇基帝迹遂光區有大震邊關殪獯醜
農既勸民惟阜穗充庭稼盈畝迨嘉辰薦芳糗納寒塲
為春酒昭景福介眉壽天斯長地斯久化無極功不朽

道亡

漢上之回改為道亡言東昏喪道義師起樊鄧也

道亡數極歸永元悠悠兆庶盡含冤沈河莫極皆無安
赴海誰授矯龍翰自樊漢仙波流水清且瀾救此倒懸
拯塗炭誓師劉旅赫靈斷率茲八百驅十亂登我聖明
去多難長夜杳冥忽云旦

忱威

忱一作抗

漢擁離改為忱威言
破加湖元勲建也

忱威授律命蒼兕

一作光

言薄加湖灌秋水迴瀾澌汨汎

增雉爭河投岸掬盈指犯必嬰戈洞流矢資此威

一作盛

烈齊文軌

漢東流

漢戰城南改為漢東流
言義師克魯山城也

漢東流江之汭逆徒蜂聚旌旗紛蔽仰震威靈乘高騁
銳至仁解網窮鳥入懷因此龍躍言登泰階

鶴樓峻

漢巫山高改為鶴樓峻
言平郢城兵威無敵也

鶴樓峻連翠微因巖設險池永歸唇亡齒懼薄言震耀

靈威出衆稽顙天不能違金湯無所用功烈長巍巍

昏主恣淫慝

漢上陵改為昏主恣淫慝言東昏政亂武帝起義平九江姑熟大破朱雀伐罪弔民也

昏主恣淫慝皆曰自昌盛上仁矜億兆誓師為請命既
齊丹浦戰又符甲子辰龕難伐有罪伐罪弔斯民悠悠
億萬姓於此覩陽春

石首局

漢將進酒改為石首局言義師平京城仍廢昏定大事也

石首局比墉瑾新堞嚴東壘峻共表裏遙相鎮矢未飛
鼓方振競銜壁並輿櫬酒池擾象廊震同伐謀蕙善陳
闕應和掃煨燼翦庶惡靡餘屑

期運集

漢有所思改為期運集言武帝膺錄受禪德威化遠也

期運集惟皇膺寶符龍躍清漢渚鳳起方城隅謳歌共
適夏獄訟兩違朱二儀啟嘉祚千載猶旦暮舞蹈流帝
功金玉昭王度

於穆

漢芳樹改為於穆言大梁闡
運君臣和樂休祚方遠也

於穆君臣君臣和以肅關王道定天保樂均靈囿燕同
在鎬前庭懸鼓鐘左右列笙鏞纓佩俯仰有則脩一作
備
禮容翔振鷺騁羣龍隆周何足擬遠與唐比蹤

惟大梁

漢上邪改為惟大梁言
梁德廣運仁化洽也

惟大梁開運受錄膺圖君八極冠帶被五都四海並和

會排闥欵塞無異塗

梁大壯大觀舞歌二首

梁初猶用凱容宣烈之舞武帝定樂以武舞
為大壯舞又舞為大觀舞又大壯舞奏夷則
大觀舞奏姑洗
取其月望也

大壯舞歌

大壯舞取易象云大壯大者壯
也正大而天地之情可見也

高高在上實愛斯人眷求聖德大拯羣倫率土方燎如
火在薪慄慄黔首暮不及晨朱光啟耀兆發穹昊我皇

鬱起龍躍漢律言屆牧野電激雷震闕鞏之甲彭濮之人或貔或武標杵浮輪我邦雖舊其命維新六伐乃止七德必陳君臨萬國遂撫八寅

大觀舞歌

大觀者取易象曰大觀在上
觀天之神道而四時不忒也

皇矣帝烈大哉興聖奄有四方受天明命居上不怠臨下惟敬舉無謬則動無失正物從其本人遂其姓昭播九功肅齊八柄寬以惠下德以為政三趾晨儀重輪夕

映棧壑忘阻梯山匪負如日有恒與天無竟載陳金石
式流舞詠咸英韶夏於茲比盛

梁鞞舞歌

明之君六首

明君本漢世鞞舞曲梁武帝時改其辭以歌君德

大梁七百始天監三元初聖功澄宇縣帝德總車書熙
熙億兆臣其志皆懽愉

刑措甫自今隆平亦肇茲神武超楚漢安用道邠岐百

拜奄來宅執玉咸在斯象天則地體無為

禮緝民用擾樂諧風自移舜琴中已絕堯衣今復垂象
天則地體無為

治兵戰六獸為邦命九官靈蛇及瑞羽分素復銜丹
望就踰軒頊鏗鏘掩咸獲九尾擾成羣八象鳴相顧象
天則地化雲布

有為臣所執司契君之道運行乃四時無言信蒼昊宸
居體冲寂忘懷定天保

至德同自然裁成侔玄造珍祥委天貺靈物開地寶窈窕降青琴參差秀朱草

日出東南隅行

以下
五言

朝日出邯鄲照我叢臺端中有傾城艷顧景織羅紈延
軀似織約遺視若回瀾瑤裝映層綺金服炫彫鑠幸有
同匡好西仕服秦官寶劍垂玉貝汗馬飾金鞍紫場類
轉雪逸控寫騰鸞羅衣夕解帶玉釵暮垂冠

昭君辭

朝發披香殿夕濟汾陰河於茲懷九逝自此斂雙蛾沾
妝疑湛露繞臆狀流波日見奔沙起稍覺轉蓬多胡風
犯肌骨非直傷綺羅銜涕試南望關山鬱嵯峨始作陽
春曲終成苦寒歌唯有三五夜明月暫經過

長歌行

連連舟壑改微微市朝變來功嗣往迹莫武祖升彥局
塗頓遠策留懽恨奔箭拊臧狀驚瀾循休擬回電歲去
芳願違年來苦心薦春貌既移紅秋林豈停蒨一倍茂

陵道寧思栢梁宴長戢兔園情永別金華殿聲徽無惑
簡丹青有餘絢幽簫且未調無使長歌倦

又

春隰萸綠柳寒墀積皓雪依依往紀盈霏霏來思結思
結纏歲宴曾是掩初節初節曾不掩浮榮逐弦缺弦缺
更圓合浮榮永沈滅色隨夏蓮變態與秋霜耄道迫無
異期賢愚有同絕銜恨豈云忘天道無甄別功名識所
職竹帛尋摧裂生外苟難尋坐為長歎設

君子行

良御惑燕楚妙察亂澠淄隄傾由漏壞垣隙自危基翳
途或妄踐黨議勿輕持

從軍行

惜哉征夫子憂恨良獨多浮天出鯢海東馬渡交河雪
縈九折磴風卷萬里波維舟無夕島秣驥乏平莎凌濤
富驚沫援木闕垂蘿江颿鳴疊嶼流雲照層阿玄埃晦
朔馬白日照吳戈寢興動征怨寤寐起還歌晨裝豈輟

警夕壘詎淹和苦哉遠征人悲矣將如何

豫章行

燕陵平而遠易河清且駛一見塵波阻臨途引征思雙
劍愛匣同孤鸞悲影異宴言誠易纂清歌信難嗣卧聞
夕鐘急坐閱朝光亟往歡墜壯心來戚滿哀志徂芳無
再馥淪灰定還熾夏臺尚可忘榮辱亦奚事愧微曠士
節徒感鄙生餌勞哉納辰和地遠託聲寄

相逢狹路間

相逢洛陽道繫聲流水車路逢輕薄子佇立問君家君
家誠易知易知復易憶龍馬滿街衢飛蓋交門側大子
萬戶侯中子飛而食小子始從官朝夕溫省直三子俱
入門赫奕多羽翼若若青組紆煙煙金鐙色大婦遶梁
歌中婦迴文織小婦獨無事閉門聊且即綠綺試一彈
玄鶴方鼓翼

長安有狹斜行

青槐金陵陌丹轂貴遊士方駿萬乘臣炫服千金子咸

陽不足稱臨淄孰能擬

三婦艷

大婦掃玉墀中婦結羅帷小婦獨無事對鏡畫蛾眉良
人且安卧夜長方自私

江離生幽渚

一作塘上行

澤蘭被荒徑孤芳豈自通幸逢瑤池曠得與金芝叢朝
承紫臺露夕潤綠池風既美修嫫女復悅繁華童夙昔
玉霜滿旦暮翠條空葉飄儲胥右芳歇露寒東紀化尚

盈昴俗志信積隆財殫交易絕華落愛難終所惜改驩
眇豈恨逐征蓬願回昭陽景持照長門宮

却出東西門行

驅馬城西阿遙眺望京關望極烟原盡地遠山河沒搖
裝非短晨還歌豈明發脩服悵悵邊羈瞻途眇鄉謁馳蓋
轉徂龍回星引奔月樂去哀境滿悲來壯心歇歲華委
徂貌年霜移暮髮辰物久侵尋征思坐淪越清氛掩行
夢憂原盪瀛渤一念起關山千里顧丘窟

飲馬長城窟

介馬度龍堆塗縈馬屢迴前訪昌海驛
雜種寇輪臺旌幕卷烟雨徒御犯冰埃

青青河畔草

漠漠牀上塵心中憶故人故人不可憶
中夜長歎息歎息想容儀不言長別離
別離稍已久空牀寄杯酒

梁甫吟

龍駕有馳策日御無停陰星籥亟迴
變氣化坐盈侵寒

光稍眇眇秋塞

一作色

日沈沈高窓仄餘火

火大火心星也

傾河

駕騰參飈風折暮草驚穉實層林時雲靄空遠淵水結
清深奔樞豈易紐珠庭不可臨懷仁每多意履順孰能
禁露清一唯促緩志且移心哀歌步梁甫歎絕有遺音

君子有所思行

晨策終南首顧望咸陽川戚里遡層闕甲館負崇軒複
塗希紫閣重臺擬望仙巴姬幽蘭奏鄭女陽春弦共矜
紅顏日俱忘白髮年寂寥茂陵宅照曜未央蟬無以五

鼎盛顧嗤三經玄

白馬篇

白馬紫金鞍停鑣過上蘭寄言狹斜子詎知隴道難赤
坂途三折龍堆路九盤冰生肌裏冷風起骨中寒功名
志所急日暮不遑飡長軀入右地輕舉出樓蘭直去已
垂涕寧可望長安匪期定遠封無羨輕車官唯見恩義
重豈覺衣裳單本持軀命答幸遇身名完

齊謳行

東秦稱右地川隰固夷昶層峰駕蒼雲濁河流素壤青
丘良杳鬱雪宮信疎敞王佐改殷命霸功繆周網

前緩聲歌

羽人廣宵宴帳集瑤池東開霞泛彩靄澄霧迎香風龍
駕出黃苑帝服起河宮九疑輔煙雨三山馭螭鴻玉鑾
乃排月瑤輶信凌空神行燭玄漢帝旆委曾虹蕭歌美
羸女笙吹悅姬童瓊漿且未洽羽轡已騰空息鳳曾城
曲滅徑青都中隆祐集皇代委祚溢華嵩

鼓吹曲二首同諸公賦

芳樹

發萼九華隈開跼寒露側氤氲非一香參差多異色宿
昔寒飈舉摧殘不可識霜雪交橫至對之長歎息

臨高臺

高臺不可望望遠使人愁連山無斷絕河水復悠悠所
思竟何在洛陽南陌頭可望不可見何用解人憂

洛陽道

洛陽大道中佳麗實無比燕裙傍日開趙帶隨風靡
領上蒲萄繡腰中合歡綺佳人殊未來薄暮空徙倚

江南曲

櫂歌發江潭采蓮渡湘南宜須間隱處舟浦子自諳羅
衣織成帶墮馬碧玉簪但令舟楫渡寧計路嶄嵌

東武吟行

天德深且曠人世賤而浮東枝纔拂景西壑已停輶
逝辭金門寵去飲玉池流霄轡一永矣俗畧從此休

怨歌行

時屯寧易犯俗險信難羣坎壈元淑賦頓挫敬通文據
淪班姬寵夙寔賈生墳短俗同如此長歌何足云

悲哉行

旅遊媚年春年春媚遊人徐光旦垂彩和露曉凝津時
嚶起稚葉蕙氣動初蘋一朝阻舊國萬里隔良辰

携手曲

捨轡下雕輅更衣捧玉牀斜簪映秋水開鏡比春粧所

畏紅顏促君恩不可長
鷄冠且容裔豈吝桂枝亡

有所思

西征登隴首東望不見家
關樹抽紫葉塞草發青芽
昆明當欲滿蒲萄應作花
垂淚對漢使因書寄狹斜

夜夜曲

二曲

河漢縱且橫北斗橫復直
星漢空如此寧知心有憶
孤燈暖不明寒機曉猶織
零淚向誰道鷄鳴徒歎息

北斗闌干去夜夜心獨傷
月輝橫射枕燈光半隱牀

釣竿

桂舟既容與綠浦復回紆
輕絲動弱莢微楫起單鳧扣
舷忘日暮卒歲以為娛

臨碣石

碣石送返潮登采禮朝日溟漲無端倪
山島玄崇崿驪
老心未窮酬思豈終畢

湘夫人

瀟湘風已息沅澧復安流
揚蛾一含睇嬈媚好且修捐

玦置澧浦解珮寄中洲

貞女引

貞女信無矯傍鄰也見疑輕生本非惜賤軀良足悲傳
芳託嘉樹弦歌寄好詞

襄陽白銅鞮歌三首

分手桃林岸送別峴山頭若欲寄音信漢水向東流
生長宛水上從事襄陽城一朝遇神武奮翼起先鳴
蹀鞞飛塵起左右自生光男兒得富貴何必在歸鄉

永明樂

聯翩貴遊子侈靡千金客華轂起飛塵珠履竟長陌

江南弄四首

以下
雜言

趙瑟曲

英華作元帝今
從樂府作沈約

邯鄲竒弄出文梓縈絃急調切流徵玄鶴徘徊白雲起
白雲起鬱披香雜復合曲未央

秦箏曲

羅袖飄飄拂雕桐促柱高張散輕宮迎歌度舞還歸風

還歸風止流月壽萬春歡無歇

陽春曲

楊柳垂地鶯差池緘情忍思落容儀弦傷曲怨心自知
心自知人不見動羅裙拂珠殿

朝雲曲

陽臺氤氲多異色巫山高高上無極雲來雲去常不息
常不息夢來遊極萬世度千秋

樂未央

億舜日萬堯年詠湛露歌採蓮願雜百花氣宛轉金爐前

四時白紵歌五首

七言

古今樂錄曰沈約云白紵五章勅臣約造武帝造後兩句

春白紵

蘭葉參差桃半紅飛芳舞轂戲春風如嬌如怨狀不同
含笑流盼滿堂中翡翠羣飛飛不息願在雲間長比翼
佩服瑤草駐容色舜日堯年歡無極

夏白紵

英華作武帝今
從樂府作沈約

朱光灼爍照佳人含情送意遙相親
嫣然一轉亂心神
非子之故欲誰因翡翠羣飛飛不息
願在雲間長比翼
佩服瑤草駐容色舜日堯年歡無極

秋白紵

白露欲凝草已黃金瑄玉柱響洞房
雙心一意共徊翔
吐情寄君君莫忘翡翠羣飛飛不息
願在雲間長比翼
佩服瑤草駐容色舜日堯年歡無極

冬白紵

寒閨晝密羅幌垂婉容麗色心相知雙去雙還誓不移
長袖拂面為君施翡翠羣飛飛不息願在雲間長比翼
佩服瑤草駐容色舜日堯年歡無極

夜白紵

秦箏齊瑟燕趙女一朝得意心相許明月如規方襲予
夜長未央歌白紵翡翠羣飛飛不息願在雲間長比翼
佩服瑤草駐容色舜日堯年歡無極

詩

侍皇太子釋奠宴

以下
四言

尊學尚矣道亦遐哉啟圖觀秘闕苑興才事高東序義
邁雲臺我我德傳灼灼英台復禮曲臺反樂宣榭闕文
內舉輜軒外駕結朋千里從師百舍隆典必修闕祀咸
薦迴鑒獻爵擬金委奠肆士辨儀胥人掌縣髣髴神蹤
徘徊靈睴

為南郡王侍皇太子釋奠宴二首

陵季相沿訓垂世殆政缺雅乖風漓化改禮亡衽席樂
沈河海三雍靡構四教誰采瞻震並峻義屬重麗橫書
清道晦彼生知

義重師匡業貴虛受襄野順風西河杜帚表跡虧光降
情迴首道御百靈神行萬有尊學尚矣繼列傳徽旗章
或舛茲道莫違自堂及室異軫同歸洋洋聖範楚楚儒
衣

三日侍鳳光殿曲水宴應制

光遲蕙畝氣婉柎臺皇心愛矣帝曰遊哉玉鸞徐警翠
鳳輕迴別殿廣臨離宮洞啟川祇奉壽河宗相禮清洛
漸筵長伊流陞汨盪嘉羞搖漾芳醴輕歌易繞弱舞難
持素雲留管玄鶴停絲引思為歲歲亦陽止叨服噴身
身亦昌止徒勤丹漆終愧文梓

為臨川王九日侍太子宴

涼風北起高鴈南翻葉浮楚水草折梁園淒涼霜野惆
悵晨鷗雲輕寒樹日麗秋原三金廣設六羽高陳寒英

始獻涼酎初醇靡靡神襟鏘鏘羣彥思媚儲猷洽和奉
宴恩暢蘭席歡同桂殿景遽樂推臨風以眷麗景天枝
位非德舉任伍辰階祈均河楚負嶽未勝瞻雲難侶
望古興惕心焉載佇

九日侍宴樂遊苑

憑玉宅海端展御天止流飛壑靜震騰川凝神貫一作責

極搞道漏泉西裘委衽南風在絃暮芝始綠年桂初丹
上林葉下滄池水寒霜霑玉樹鴈動輕瀾停蹕玉陞徙

衛璿墀瑇瑁箱鳳彩羽蓋鸞姿虹旌迢遞翠華歲粦禮弘
灞汭義高洛湄

從齊武帝瑯琊城講武應詔

以下
五言

九功播祧墀七德陳武懸展事昌國圖息兵由重戰皇
情咨閱典出車迨辰選飾徒映寒隰翻綏臨廣甸颯沓
佩吳歌參差腰夏箭風旆舒復卷雲霞清以轉輕舞信
徘徊前歌且遙衍秋原嘶代馬朱光浮楚練虹壑寫飛
文巖阿藻餘絢發震嶽靈從揚旌水華變憑高訓武則

中天起遐眷鳳蓋捲洪河珠旗掃長沂方侍翠華舉遠
適遙池宴

三日侍林光殿曲水宴應制

宴鎬鏘玉鑿遊汾舉仙輶榮光泛彩旄修風動芝蓋淑
氣婉登晨天行聳雲旆帳殿臨春籞帷宮繞芳薈漸席
周羽觴分墀引迴瀨穆穆玄化升濟濟皇階泰將御遺
風軫遠侍瑤臺會

侍宴樂遊苑餞呂僧珍應詔

丹浦非樂戰負重切君臨我皇秉至德忘已用堯心慙
茲區宇內魚鳥失飛沈推轂二嶠道揚旆九河陰超乘
盡三屬選士皆百金戎車出細柳餞席遵上林命師誅
後服授律緩前禽函輟方解帶驍武稍披襟伐罪芒山
曲弔民伊水潯將陪告成禮待此未抽簪

正陽堂宴勞凱旋

凱入同高宴飲至均多祐昔往歌採薇今來歡杖杜善
戰惟我皇勝之不窺戶推轂授神謨餘壯終能賈浩蕩

金罍溢周流玉觴溥

遊鍾山詩應西陽王教

五章

靈山紀地德地險資嶽靈終南表秦觀少室邇王城翠
鳳翔淮海衿帶遶神垵北阜何其峻林薄杳蔥青

發地多奇嶺千雲非一狀合沓共隱天參差互相望鬱
律構丹巘峻嶒起青嶂勢隨九疑高氣與三山壯
卽事既多美臨眺殊復奇南瞻儲胥觀西望昆明池山
中咸可悅賞逐四時移春光發隴首秋風生桂枝

多值息心侶結架山之足八解鳴澗流四禪隱巖曲窈
冥終不見蕭條無可欲所願從之遊寸心於此足

君王挺逸趣羽旆臨崇基白雲隨玉趾青霞襍桂旗淹
留訪五藥顧步佇三芝於焉仰鑣駕歲暮以為期

登高望春

登高眺京洛街巷紛漠漠迴首望長安城關鬱盤桓日
出照鈿黛風過動羅紈齊童躡朱履趙女揚翠翰春風
搖雜樹歲華綠且丹寶瑟玫瑰柱金羈玳瑁鞍淹留宿

下蔡置酒過上蘭解眉還復斂方知巧笑難佳期空靡
靡含睇未成歡嘉客不可見因君寄長歎

遊金華山

遠策追夙心靈山協久要天倪臨紫闕地道通丹竅未
乘琴高鯉且縱嚴陵釣若蒙羽駕迎得奉金書召高馳
八閭闔方覩靈妃笑

劉真人東山還

連峯竟無已積翠遠微微寥戾野風急芸黃秋草腓我

來歲云暮於此悵懷歸霜雪方共下寧止露霑衣待余
兩岐秀去去掩柴扉

登玄暢樓

危峯帶北阜高頂出南岑中有陵風榭迴望川之陰岸
險每增減湍平互淺深水流本三派臺高乃四臨上有
離羣客客有慕歸心落暉映長浦煥景燭中潯雲生鎖
乍黑日下溪半陰信義非吾土何事不抽簪

酬謝宣城卧疾

王喬飛鳧舄東方金馬門從宦非官侶避世作避諠揆
予發皇鑒短翮屢飛翻晨趨朝建禮晚沐卧郊園賓至
下塵榻憂來命綠尊昔賢侔時雨今守馥蘭蓀神交疲
夢寐路遠隔思存牽拙謬東汜浮情及西崑顧循良菲
薄何以麗璵璠將隨渤澥去刷羽汎清源

新安江至清淺深見底貽京邑遊好

眷言訪舟客茲川信可珍洞徹隨清淺皎鏡無冬春千
仞寫喬樹百丈見遊鱗滄浪有時濁清濟涸無津豈若

乘斯去俯映石磷磷紛吾隔囂滓寧假濯衣巾願以潺湲水霑君纓上塵

送別友人

外編作任昉者非

君東我亦西銜悲涕如霰浮雲一南北何由展言宴方作異鄉人贈子同心扇遙裔發海鴻連翻出簷燕春秋更去來參差不相見

去東陽與吏民別

微薄叨今幸忝荷非昔期唐風豈異世欽明重在茲飾

驂去闕輔分竹入河淇下車如昨日曳組忽彌晷霜載
凋秋草風三動春旗無以招卧轍寧望後相思

早發定山

夙齡愛遠壑晚蒞見奇山標峯綵虹外置嶺白雲間傾
壁忽斜豎絕頂復孤圓歸海流漫漫出浦水濺濺野棠
開未落山櫻發欲然忘歸屬蘭杜懷祿寄芳荃眷言採
三秀徘徊望九仙

循役朱方道路

分繻出帝京升裝奉皇穆洞野屬滄溟聯郊遡河服日
映青丘島塵起邯鄲陸江移林岸微巖深煙岫複歲嚴
摧磴草午寒散嶠木縈蔚夕飈卷蹉跎晚雲伏霞志非
易從旌軀信難收豈慕湍宮梧方辭免園竹羈心亦何
言迷蹤庶能復

和竟陵王遊仙詩二首

天

一作天

矯

一作矯

垂絳仙螭衣方陸離玉鑿隱雲霧溶溶

紛上馳瑤臺風不息赤水正漣漪崢嶸玄圃上聊攀瓊

樹枝

朝止閭闔宮暮宴清都闕騰蓋擁奔星低鑾避行月九
疑紛相從虹旌乍升沒青鳥去復還高唐雲不歇若華
有餘照淹留且晞髮

遊沈道士館

秦皇御宇宙漢帝恢武功歡娛人事盡情性猶未充銳
意三山上托慕九霄中既表祈年觀復立望仙宮寧為
心好道直由意無窮曰余知止足是願不須豐遇可淹

留處便欲息微躬山嶂遠重疊竹樹近蒙籠開襟濯寒
水解帶臨清風所累非外物為念在玄蹤朋來握石髓
賓至駕輕鴻都令人徑絕惟使雲路通一舉凌倒景無
事適華嵩寄言賞心客歲暮爾來同

還園宅奉酬華陽先生

早欲尋名山期待婚嫁畢二事雖云已此外復非一忽
聞龍圖至仍覩榮光溢副朝首八元開壤賦千室冠纓
曾弗露風雨未嘗櫛鳴玉響洞門金蟬映朝日暫無小

人報徒叨令尹秩豈忘平生懷靡盬不遑恤

華陽先生登樓不復下贈呈

側聞上士說尺木乃騰霄雲駢不展地仙居多麗譙卧
待三芝秀坐對百神朝銜書必青鳥佳客信龍鑣非止
靈桃實方見大椿凋

酬華陽陶先生

三清未可覲一氣且空存所願迴光景拯難拔危魂若
蒙九丹贈豈懼六龍奔

奉華陽王外兵

餐玉駐年齡
吞霞反容質
渺識青丘樹
迴見扶桑日
爛漫蜃雲舒
嶽峯山海出

赤松澗

松子排煙去
英靈眇難測
惟有清澗流
潺湲終不息
神丹在茲化
雲軒於此陟
願受金液方
片言生羽翼
渴就華池飲
饑向朝霞食
何時當來還
延佇青巖側

八關齋

因戒倦輪飄習障從塵染四衢道難闢八正扉猶掩得
理未易期失路方知險迷塗既已復豁悟非無漸

古意

挾瑟叢臺下徙倚愛容光佇立日已暮戚戚苦人腸露
葵已堪摘淇水未沾裳錦衾無獨暖羅衣空自香明月
雖外照寧知心內傷

少年新婚為之詠

山陰柳家女薄言出田野丰容好姿顏便僻巧言語腰

肢既軟弱衣服亦華楚紅輪映早寒畫扇迎初暑錦履
並花紋繡帶同心苴羅襦金薄厠雲髻花釵舉我情已
鬱紆何用表崎嶇託意眉間黛申心口上朱莫爭三春
價坐喪千金軀盈尺青銅鏡徑寸合浦珠無因達往意
欲寄雙飛鳬裾開見玉趾衫薄映凝膚羞言趙飛燕笑
殺秦羅敷自顧雖悴薄完蓋曜城隅高門列駟駕廣路
從驪駒何慚鹿盧劍詎減府中趨還家問鄉里詎堪持
作夫

夢見美人

夜聞長嘆息知君心有憶果自闔闔開魂交覩顏

王臺作客

色既薦巫山枕又奉齊眉食立望復橫陳忽覺非在側
那知神傷者潺湲淚沾臆

直學省愁卧

秋風吹廣陌蕭瑟入南闌愁人掩軒卧高牕時動扉虛
館清陰滿神宇曖微微網蟲垂戶織夕鳥傍欄飛纓珮
空為忝江海事多違山中有桂樹歲暮可言歸

休沐寄懷

雖云萬重嶺所翫終

一作惟

一丘堦墀幸自足安事遠遨

遊臨池清潯暑開幌望高秋園禽與時變蘭根應節抽
憑軒寒木末垂堂對水周紫籜開綠篠白鳥映青疇艾
葉彌南浦荷花遠北樓送日隱層閣引月入輕幃燠熟
寒蔬翦賓來春蟻浮來往既云勸光景為誰留

宿東園

陳王闕難道安仁採樵路東郊豈異昔聊可閒余步野

徑既盤紆荒阡亦交互
槿籬疎復密荆扉新且故
樹頂鳴風颭草根積霜露
驚磨去不息征鳥時相顧
茅棟嘯愁鴟平岡走寒兔
夕陰帶層阜長煙引輕素
飛光忽我適豈止歲云暮
若蒙西山藥顏齡倘能度

行園

寒瓜方卧瓏秋菰亦滿陂
紫茄紛爛漫綠芋鬱參差
初菰向堪把時並日離離
高梨有繁實何減萬年枝
荒渠集野鴈安用昆明池

和左丞庾杲之移病

歲暮豈云聊參差憂與疾匪澣孰能賜持身固無述握
蘭空盈把待漏終不溢囂喧滿眼前簿領紛盈膝安用
談天辯徒勞夢賜筆挂冠若東都山林寧復出

和竟陵王抄書

教微因弛轡維峻屬貞期義乖良未遠斯文煥在茲超
河綜絕禮冠楚綴淪詩披滕辨蠹冊酌醴訪深疑澄流
黜往性泛畧引前滋漢壁含遺篆名山多逸詞綠編方

委閣素簡日盈輜空幸參鴛鴦比秀惡瓊芝挹流既知
廣復道還自嗤

奉和竟陵王郡縣名

西都富軒冕南宮溢才彥高關連朱雉方渠漸游殿廣
川肆河濟長岑繞嶠汧曲梁濟危渚平臯騁悠眄清淵
皎澄徹曾山鬱葱蒨陽泉濯春藻陰丘聚寒霰西華不
可留東光促奔箭望都遊子懷臨戎征馬倦既豫平臺
集復齒南皮宴一窺長安城羞言杜陵掾

奉和竟陵王樂名

丹草秀朱翹重臺架危岳木蘭露易飲射干枝可結陽
隰採辛夷寒山望積雪玉泉亟周流雲華乍明滅合歡
葉暮卷爵林聲夜切垂景迫連桑思仙慕雲埒荆實剖
丹瓶龍芻汗奔血照握乃夜光盈車非玉屑細柳空歲
澌水萍終委絕黃符若可挹長生永昭哲

和陸慧曉百姓名

建都望淮海樹闕表衡稽井幹風雲出栢梁星漢齊皇

王臨萬宇惠化覃黔黎吉士服仁義宿昔秉華主庸賢
起幽谷欽言非象犀端委康國步偃息召邦攜舉政方
分策易紀粲金泥伊余沐嘉幸由是別園畦曾微涓露
答光景遂雲西方隨煉丹子薄暮矯行迷

三月三日率爾成章

麗日屬元巳年芳具在斯開花已匝樹流嚶復滿枝洛
陽繁華子長安輕薄兒東出千金堰西臨鴈鷺陂遊絲應
空轉高楊拂地垂綠幘文照耀紫燕光陸離清晨戲伊

水薄暮宿蘭池象筵鳴寶瑟金瓶泛羽卮寧憶春蠶起
日暮桑欲萎長袂屢已拂彫胡方自炊愛而不可見宿
昔減容儀且當忘情去歎息獨何為

織女贈牽牛

紅粧與明鏡二物本相親用持施點畫不照離居人往
秋雖一照一照復還塵塵生不復拂蓬首對河津冬夜
寒如此寧遽道陽春初商忽云至暫得奉衣巾施襟已
成故每聚忽如新

應王中丞思遠明月

月華臨靜夜，夜靜滅氛埃。
方暉竟戶入，圓影隙中來。
高樓切思婦，西園遊上才。
網軒映珠綴，應門照綠苔。
洞房殊未曉，清光信悠哉。

和王中書德充詠白雲

白雲自帝鄉，氛氲屢迴沒。
蔽虧崑山樹，含吐瑤臺月。
秋風西北起，飄我過城闕。
城闕已參差，白雲復離離。
皎潔在天漢，倒影入華池。
將過丹丘野，時至碧林垂。
九重迎

飛燕萬里送翔螭

詠雪應令

思鳥聚寒蘆蒼雲軫暮色夜雪合且離曉風驚復息嬋娟入綺窗徘徊鶩情極弱桂不勝枝輕飛屢低翼玉山聊可望瑤池豈難即

和劉雍州繪博山香爐

範金誠可則摛思必良工凝芳自朱燎先鑄首山銅瓌姿信崑嶠奇態實玲瓏峰嶺互相拒巖岫杳無窮赤松

遊其上斂足御輕鴻蛟螭盤其下驤首眄層穹嶺側多
奇樹或孤或複叢巖間有佚女垂袂似含風暈飛若未
已虎視鬱餘雄登山起重障左右引絲桐百和清夜吐
蘭煙四面充如彼崇朝氣觸石繞華嵩

詠湖中鴈

白水滿春塘旅鴈每迴翔
唼流牽弱藻斂翮帶餘霜
羣浮動輕浪單沉逐孤光
懸飛竟不下亂起未成行
刷羽同搖漾一舉還故鄉

冬節後至丞相第詣世子車中作

庶公失權勢門館有虛盈貴賤猶如此況在曲池平高
車塵未滅珠履故餘聲賓階綠錢滿客位紫苔生誰當
九原上鬱鬱望佳城

奉和竟陵王經劉嶽墓

表閭欽逸軌軾墓禮真魂化塗終眇默神理暖猶存塵
經一作駕未輟幌高衡已委門日蕪子雲舍徒望董生園

華陰無遺布楚席有靈樽玄泉倘能慰長夜且勿論

悼亡

去秋三五月今秋還照梁今春蘭蕙草來春復吐芳悲

哉人道異一謝永銷亡簾屏既毀撤一作屏筵
空有設帷席更

施張游塵掩虛座孤帳覆空牀萬事無不盡徒令存者

傷

侍遊方山應詔

清漢夜昭暫扶桑曉陸離發歌擬陽下一作發
垂楊下建羽

朝夕池擬金浮水若聳蹕昭山祗一霑九霄露藜藿終

自知

樂將殫恩未已應詔

淒鏘笙管道參差舞行亂輕肩既屢舉長巾亦徐換雲
鬢垂寶花輕粧染微汗羣臣醉又飽聖恩猶未半

泛永康江

長枝萌紫葉清源泛綠苔山光浮水至春色犯寒來臨
睨信永矣望美暖悠哉寄言幽閨妾羅袖勿空裁

餞謝文學離夜

漢池水如帶巫山雲似蓋
潯汨背吳潮潺湲橫楚瀨
一望沮漳水寧思江海會
以我徑寸心從君千里外

別范安成

生平少年日分手易前期
及爾同衰暮非復別離時
勿言一樽酒明日難重持
夢中不識路何以慰相思

效古

可憐桂樹枝單雄憶故雌
歲暮異栖宿春至猶別離
山河隔長路路遠絕容儀
豈云無可玉堂作我匹寸心終不移

庭雨應詔

出空寧可圖入庭倍難賦非煙復非雲如絲復如霧霰
霰裁欲垂霏微不能注雖無千金質聊為一辰趣

初春

夾道覓陽春相將共携手草色猶自腓林中都未有無
事逐梅花空教信楊柳且復共歸來含情寄杯酒

春思

楊柳亂如絲綺羅不自持春草黃復綠客心傷此時青

苔已結浦碧水復盈淇日華照趙瑟風色動燕姬襟前
萬行淚故是一相思

傷春

弱草半抽黃輕條未全綠年芳被禁禦煙花繞層曲寒
苔卷復舒冬泉斷方續早花散凝金初露泣成玉

秋夜

月落宵向分紫煙鬱氛氲瞠瞠螢入霧離離鴈度雲已
童暗理瑟漢女夜縫裙新知樂如是久要豈相聞

同詠樂器

詠簾

江南簫管地
妙響發孫枝
殷勤寄玉指
含情舉復垂
雕梁再三繞
輕塵四五移
曲中有生意
丹誠君詎知

同詠坐上玩器

詠竹櫛榔盤

梢風有勁質
柔用道非一
平纖方以文
穿成圓且密
薦差雖百品
所貴浮天實
幸成歡醕
餘寧辭嘉宴畢

簷前竹

萌開籜已垂結葉始成枝繁蔭上翦茸促節下離離風
動露滴漚月照影參差得生君戶牖不願夾華池

翫庭柳

輕陰拂建章夾道連未央因風結復解霑露桑且長楚
妃思欲絕班女淚成行遊人未應去為此還故鄉

麥李

青玉冠西海碧石彌外區化為中園實其下成路衢在

先良足貴因小邈難逾色潤房陵縹味奪寒水朱摘持
欲以獻尚食且踟躕

詠桃

風來吹葉動風去畏花傷紅英已照灼况復含日光歌
童暗理曲游女夜縫裳詎減當春淚能斷思人腸

詠青苔

緣階已漠漠汎水復綿綿微根如欲斷輕絲似更聯長
風隱細草深堂沒綺錢縈鬱無人贈歲荏徒可憐

十詠二首

領邊繡

織手製新奇刺作可憐儀
縈絲飛鳳子結縷坐花兒
不聲如動吹無風自裊枝
麗色倘未歇聊承雲鬢垂

脚下履

丹墀上颯沓玉殿下趁鐙
逆轉珠珮響先表繡袿香裾
開臨舞席袖拂繞歌堂所歎
忘懷妾見委入羅牀

懷舊詩九首

傷王融

元長秉奇調弱冠慕前蹤
眷言懷祖武一簣望成峰
途艱行易跌命舛志難逢
折風落迅羽流恨滿青松

傷謝朓

吏部信才傑文鋒振奇響
調與金石諧思逐風雲上
豈言陵霜質忽隨人事往
尺璧爾何冤一旦同丘壤

傷庾杲之

左率馥時譽秀出冠朋僚
聳茲千仞氣振此百尋條
蘊

藉含文雅散朗溢風飈楸櫟今已合容範尚昭昭

傷王湛

長史體閒任坦蕩無外求持身非詭遇應物有虛舟心
從朋好盡形為歡宴留歡宴未終畢零落委山丘

傷虞炎

東南既擅美洛陽復稱才携手同歡宴比跡共遊陪事
隨短秀落言歸長夜臺

傷李珪之

少府懷貞節忘軀濟所奉吏道勤不息繁文長自擁既
闕優孟歌身沒誰為寵

傷韋景猷

韋叟識前載博物備戎華稅驂止營校淪跡委泥沙始
知庸聽局方悟大音賒

傷劉渢

處和無近累天然有勝質蕭瑟負高情耿介懷秋實義
貴良為重蘭摧非所恤一罷平生言寧知携手日

傷胡諧之

豫州懷風範，綽然標雅度。
處約志不渝，接廣情無忤。
頡頏事刀筆，紛綸遞朱素。
美志同山阿，浮年迫朝露。

詠新荷應詔

勿言草卉賤，幸宅天池中。
微根纔出浪，短幹未搖風。
寧知寸心裏，蓄紫復含紅。

聽蟬鳴應詔

輕生宅園籞，復得棲嘉樹。
豈敢擅洪枝，輕條遭所遇。
葉

密形易揚風迴響難住

詠笙

彼美實枯枝孤篠定參差
鷓鴣已啁哳棗下復林離
本期王子宴寧待洛濱吹

詠箏

秦箏吐絕調玉柱揚清曲
絃依高張斷聲隨妙指續
徒聞音繞梁寧知顏如玉

詠石榴

靈園同佳稱幽山有奇質停采久彌鮮含華豈期實長
願微名隱無使孤株出

大言應令

隘此大汎庭方知九垓局窮天豈彌指盡地不容足

細言應令

開館尺椳餘築榭微塵裏蝸角列州縣毫端建朝市

詠餘雪

陰庭覆素芷南階褰綠施玉臺新落構青山已半虧

詠帳

甲帳垂和璧螭雲張桂宮隋珠既吐曜翠被復含風

侍宴詠反舌

假容不足觀遺音猶可薦幸蒙喬樹思得以聞高殿

寒松

梢聳振寒聲青蔥標暮色疎葉望嶺齊喬榦臨雲直

詠孤桐

龍門百尺時

一作時

排雲少孤立分根蔭玉池欲待高鸞

集

詠梧桐

秋還遽已落春曉猶未萸微葉雖可賤一剪或成珪

園橘

綠葉迎露滋朱苞待霜潤但令入玉枰金衣非所恡

詠梨應詔

大谷來既重岷山道又難摧折非所恡但令入玉盤

西地梨

詩彙作
簡文非

列茂河陽苑蓄紫濫觴隈翻黃秋沃若落葉春徘徊

詠芙蓉

微風搖紫葉輕露拂朱房中池所以綠待我泛紅光

詠杜若

生在窮絕地豈與世相親不顧逢采擷本欲芳幽人

詠鹿蔥

野馬不任騎兔絲不任織既非中野花無堪麝麝食

甘蕉

抽葉固盈丈擢本信兼圍
流甘拊柳實弱縷冠締衣

詠菰

結根布洲渚垂葉滿臯澤
匹彼露葵羹可以留上客

早行逢故人車中為贈

殘朱猶曖曖餘粉尚霏霏
昨宵何處宿今晨拂露歸

為鄰人有懷不至

影逐斜月來香隨遠風入
言是定知非欲笑翻成泣

阻雪連句

初昕逆翮舉日昃駑馬疲幽山有桂樹歲暮方參差

和劉中書仙詩二首

清旦發玄洲日暮宿丹丘崑山西北映流泉東南流霓
裳拂流電雲車委輕靄崢嶸上不覩寥廓下無見
殊庭不可及風燥多異色霞衣不待縫雲錦不須織

華山館為國家營功德

沐芳禱靈嶽稽首恭上玄帝昔祈萬壽臣今請億年丹
方緘洞府河清時一傳錦書飛雲字玉簡黃金編

和王衛軍解講

妙輪輟往駕寶樹未開音甘露為誰演得一標道心眇眇玄塗曠高義總成林七花屏塵相八解濯芳襟

侍宴謝朓宅餞東歸應制

皇情悵東舳羽旆拂南廛夏雲清朝景秋風揚早蟬飲和陪下席論道光上筵

酬孔通直過懷蓬居

閭闔既洞啟龍樓亦高闕兩宮集南步二闥引通籍伊

爾事清途紛吾供賤役

石塘瀨聽猿

噉噉夜猿鳴溶溶晨霧合不知聲遠近惟見山重沓既
歡東嶺唱復佇西巖答

出重圍和傅昭

魯連揚一策陳平出六奇邯鄲風雨散白登烟霧維排
雲出九地陵定振五危

秋晨羈怨望海思歸

分空臨澥霧披遠望滄流八桂暖如畫三桑眇若浮煙
極希丹水月遠望青邱

侍宴樂游苑餞徐州刺史應詔

沃若動龍驂參差凝鳳管金塘草未合玉池泉將滿

憩郊園和約法師採藥

郭外三千里欲以貿朝饘繁蔬既綺布密果亦星懸

四城門光

六龍既驚軫二鼠復馳光衰齡難慎輔暮質易凋傷

上巳華光殿 七言

於維盛世即軒矯朝酈宴鎬復在斯朝光灼爍映蘭池
春風婉轉入細枝時鷺顧慕聲合離輕波微動漾羽卮
河宗海若生蛟螭浮梁徑度跨迴漪朱顏始洽景將移
安得壯士駐奔曦

六憶詩四首

以下
雜言

憶來時灼灼上堦墀勤勤叙別離慊慊道相思相看常
不足相見乃忘饑

憶坐時點點羅帳前或歌四五曲或弄兩三絃笑時應
無比嗔時更可憐

憶食時臨盤動容色欲坐復羞坐欲食復羞食含哺如
不饑擎甌似無力

憶眠時人眠彊未眠解羅不待勸就枕更須牽復恐傍
人見嬌羞在燭前

八詠詩

登臺望秋月

望秋月秋月光如練照曜三爵臺徘徊九華殿九華玳
瑁梁華棖與壁璫以茲雕麗色持照明月光凝華入黼
帳清輝懸洞房先過飛燕戶却映班姬牀桂宮裊裊落
桂枝早寒淒淒凝白露上林晚葉颯颯鳴鴈門早鴻離
離度湛秀質兮似規委清光兮如素照愁軒之蓬髮影
金堦之輕步居人臨此笑以歌別客對之傷且暮經衰
圃映寒叢凝清夜帶秋風隨庭雪以偕素與池荷而共
紅臨玉墀之皎皎含霜霑之濛濛躡天衢而徒度轢長

漢而飛空隱巖崖而半出隔帷幌而纔通散朱庭之爽
爽入青瑣而玲瓏寒階悲寡鵠沙洲怨別鴻文姬泣胡
殿昭君思漢宮余亦何為者淹留此山東

會圃臨春風

臨春風春風起春樹遊絲暖如網落花零似霧先泛天
淵池還過細柳枝蝶逢飛搖颺燕值羽差池揚桂旆動
芝蓋開燕裾吹趙帶趙帶飛參差燕裾合且離迴簪復
轉黛顧步惜容儀容儀已灼灼春風復迴薄氛氲桃李

花青跗含素萼既為風所開復為風所落搖綠蒂抗紫
莖舞春雪襟流鶯曲房開兮金鋪響金鋪響兮妾思驚
梧臺未陰淇川始碧迎行雨於高唐送歸鴻於碣石經
洞房響紉素感幽閨思惟帝想芳園兮可以遊念蘭麝
兮漸堪摘拂明鏡之冬塵解羅衣之秋襪既鏗鏘以動
佩又綢繆而流射始搖蕩以入閨終徘徊而緣隙鳴珠
簾於綉戶散芳塵於綺席是時悵思歸安能久行役佳
人不在茲春風誰為惜

歲暮愍衰草

愍衰草衰草無容色憔悴荒徑中寒茲不可識昔時兮
春日昔日兮春風銜花兮佩實垂綠兮散紅氛氲鳩鵲
右照曜望仙東送歸顧慕泣淇水嘉客淹留懷上宮巖
隄兮海岸冰多兮霰積爛漫兮巖根攢幽兮石隙布綿
密於寒臯吐纖疎於危石既惆悵於君子倍傷心於行
役露縞枝於初旦霜紅天於始夕彫芳卉之九衢實靈
茅之三脊風急嶠道難秋至客衣單既傷簷下菊復悲

池上蘭飄落逐風盡方知歲早寒流螢暗明燭鴈聲斷
纔續委絕長信宮蕪穢丹墀曲霜奪莖上紫風銷葉中
綠山變兮青薇水折兮黃葦秋鴻兮踈引寒鳥兮聚飛
徑荒寒草合桐長舊巖圍一作草長
荒徑微園庭漸蕪沒霜露
日霑衣願逐晨征鳥薄暮共西歸

霜來悲落桐

悲落桐落桐早霜露燕至葉未抽鴻來枝已素本出龍
門山長枝仰刺天上峰百丈絕下趾萬尋懸幽根未蟠

結孤株復危絕初不照光景終年負霜雪自顧無羽儀
不顧生曲池芬芳本自乏華實無所施公子特留貯王
孫少見知分取孤生枿徒置北堂陞宿莖抽晚榦新葉
生故枝故枝雖遼遠新葉頗離離春風一朝至榮華坐
如斯自惟良菲薄君恩徒照灼顧已非嘉樹空用凭阿
閣願作清廟琴為君舞玄鶴薜荔可為裳文杏堪作梁
勿言草木賤徒照君末光末光不徒照為君含噉咷一作
寧陽柯淥水絃陰枝苦寒凋厚德非所任敢不虛其心

若逢陽春至吐綠照清潯

夕行聞夜鶴

聞夜鶴夜鶴叫南池對此孤明月臨風振羽儀伊吾人之菲薄無賦命之天爵抱跼促之短懷隨冬春而哀樂愍海上之驚鳬傷雲間之離鶴離鶴昔未離迴發天北垂忽遇疾風起暫下昆明池復畏冬冰合水宿非所宜欲棲不可往欲去飛已疲勢逐疾風舉求溫向衡楚復值南飛鴻參差共成侶海上多雲霧蒼茫失洲嶼自此

別故羣獨向瀟湘渚故羣不離散相依江海岸夜止羽
相切晝飛影相亂刷羽共浮沉湛澹泛清潯既不經離
別安知慕侶心九冬負霜雪六翮飛不任且養凌雲翅
俛仰弄清音所望浮丘子旦夕來相尋

晨征聽曉鴻

聽曉鴻曉鴻度將旦跨弱水之微瀾發成山之遠岸怵
春歸之未幾傷此歲之云半出海漲之蒼茫入雲途之
瀰漫無東西之可辨孰遐邇之能算微昔見於洲渚赴

秋期於江漢集勁風於弱軀負重雪於輕翰寒溪可以
飲荒臯可以竄溪水徒自清微容豈足翫秋蓬飛兮未
極塞草寒兮無色吳山高兮高難度越水深兮深不可
測兼明月之馳光顧征禽之駛翼伊余馬之屢懷知君
行之未極

一作息

夜綿綿而難曉愁參差而盈臆望山川

悉無似唯星河猶可識孤鴈夜南飛客淚夜沾衣春鴻

旦暮返客子方未歸歲去歡娛盡年來容貌衰

一作非攬

衽形雖是撫臆事多違青綯雖長復易解白雲誠遠詎

難依

解佩去朝市

去朝市朝市深

一作晨

歸暮辭北纓而南徂浮東川而西

顧逢天地之降祥值日月之重光伊吾行之未已

一作伊當

仁之菲薄

非余情之信芳充待詔於金馬奉高宴於栢梁觀

鬪獸於虎圈望窈窕於披香遊西園兮登銅雀攀青瑯

兮眺重陽講金華兮議宣室畫武帳兮夕文昌佩甘泉

兮履五柞簪粉栢

音詣

兮黻承光託後車兮侍華幄游渤


海兮泛清漳天道有盈缺寒暑遞炎涼一朝賣玉枕眷
眷惜餘香曲池無復處桂枝亦銷亡清廟徒肅肅西陵
久茫茫薄暮余多幸嘉運重來昌泰稽郡之南尉典干
里之光貴別北芒於濁河戀橫橋於清渭望前軒之早
桐對南階之初卉唯余情之屢傷豈茲焉之能慰眷昔
日兮懷哉歲將暮兮歸去來

被褐守山東

守山東山東萬里鬱青蔥兩溪共一瀉水潔望如空岸

側青莎被巖間丹桂叢上瞻既隱軫下睇亦溟濛遠林
響咆獸近樹聒鳴蟲路帶若溪右澗吐金華東萬仞倒
危石百丈注懸淙掣曳瀉流電奔飛似白虹洞井含清
氣漏穴吐飛風玉竇膏滴漑石乳室空籠峭嶮塗彌險
巖岨步纔通余捨平生之所愛歛暮年之此逢歆一去
而不還悵鄒一作恨邦衣之未褫揖林壑之清曠事氓俗之
紛詭幸帝德之方升值天綱之未毀既除舊而就新故
化民而俗徙播趙俗以南徂扇齊風以東靡乳雉方可

馴流蝗庶能弭清心矯世濁儉政救民侈秩滿撫白雲
淹留事芝髓



漢魏六朝百三家集卷八十八